

Ovaluwa

Nneere havi wi Nimaalihe Ovaluwa Vade

(DIARREIA COMO TRATÁ-LA EM CASA)



Texto original:

Ministério de Saúde Pública
Direction de la Médecine Préventive
PRITECH
República dos Camarões



Ficha Técnica

Título: Ovaluwa Nneere havi wi Nimaalihe Vade
(Diarreia como tratá-la em casa)
(Home Treatments for Diarrhea)

Língua: Etakwane

Artista: Mbanji Bawe Ernest

Primeira edição electrónica, 2010

Produzido por: Programa da Língua Etakwane e SIL Moçambique
lidemo.net@gmail.com
C.P. 652
Nampula, Nampula
Moçambique

O utilizador pode copiar e distribuir esta obra



Mwaana
mung'onong'ono
aavaluwaga,
aahikameliwa
mowaaguva
onofiyedha okwa.

Ahima
owaakwana macikwi
makumi matanu
enookwa yaaka

dhatedhene ni oreda ola. Ovaluwa onotatamula dhoorusa dhowopiha mmwiilini. Dhowopiha nda dhineeriwa: dezidaratasawu (ohukanna mahinje mmwiilini).

Dezidaratasawu: Enatapulela wi mwaana kanakanna mahinje owaakwana mmuwilini mwaaye. Mwaana avaluwaga, onottattila mahinje majinji a mmwilini. Nda kadhinaapadduwela ahimave. Athu ateene enokanna dhorusa dhedhi. Mwa dhatedhene, dhithabwilese wowoopiha wa ahima ang'onong'ono. Muthu ahikanna mahinje, naari vang'onong'onove mmwiilini, onakala eeni: mulomo ni nlumi dhinowuuma, meento enovolowa, kananyemela, onogoma, naari kanakanna mitori.

Wamvahaga mwaana dhamahinje ang'waga vade, onomukamihedha wi ovaluwawa ohuttabwe. Omvahege mwaanaya dhamahinje woona: masaza, caya a matakuru a nipeyara, mahinje a mataba owapiya, (sinora, mataba mateene makiti woona mukwani ni dhimohi) soro, naari mahinje apama.



Kumvahege dhooja dhokanna makura. Akala mwaanaya onokoodda ong'wa, naari onoraveya, enofuneya ovilelege, omuwaddihedhege.



Omvahege dhamahinje nda mu mpimo ola:
-Ahima ehinaakwanihe yaaka biili dhobaliwa, ogomelihege vaari va kopo.
-Owunnuwelavo, kopo yodhala emohi.

Omvahege mpimo ola avaluwaga, naari afunaga ong'wa. Ahima ang'onong'ono, wavahedhege mukoponi, naari mukwiyerini. Kumung'wihedhege mugarafwani, vowi nnorusa ohuwawa wi nikalege napamanene. Garafwa natakala, nnotatamula mareda amohi. Omvahegeve afunaga ong'wa.

Mwawelawo
hosipitale, mwiiregena
dhendo dhinaddeliwinyu ni
dotori, ofiyedha mwaana
akale pama. Vofuna ohiiha
wi onadhe awelele ovaluwa,
kaxixani mowi eeni:



- ⇒ Mumvahege mukaka wa mmabeleni mwaaninyu;
- ⇒ Mung'wege mahinje owaapisa, naari owacicitta;
- ⇒ Muhabege mmadadani mwafunaga opiya dhooja, muhunaje, muhunamwaamwihe mwaana, teto mwawelawo ocimbuzi;
- ⇒ Mvolowege mucimbuzi;
- ⇒ Mari a mwaana muttattilelege mucimbuzini, naari mwaatibelege pamadhene;
- ⇒ Ompopihe (vacina)mwaana ni addibilaaye ottawa oreda wa ttoba (sarampo) ni dhiredda dhimohi;
- ⇒ Ajege dhooja dhinonnuwiha mwiili: (mandduwi, cipamba, somba, nyama, mazayi) ni dhinavaha kopolo (mbuga, mavila, ni dhohadda dhimohi), malabo mateene.

Mwaana abulelaga onofuna dhooja dhookanna mavitamina.

Nda sofuneya vajinji wa ahima ang'onong'ono, naari eli owoondda ni oogoma. Aliwa enofuna dhooja dhinonnuwiha pama mwiili, dhinavaha kopolo. Mwaana onofuna dhooja dha musawu olena mudhidhi oli wateene, agali apameene, naari abulelaga, naari omambeeelo dhitatamulaga ovaluwa wulubalewene. Mwa dhatedhene dhinovulusa egumi yaaye. Mwaana avaluwaga, ajege vang'ono, wi nifu, nandegge osila pama dhoojadha. Vavira mudhidhi mujinjene abulelaga nifu kannada osila dhoojadha. Ovaluwa wamaala mwaana onofuna ooja vajinji. Mowindo, onowelelihamo onyemela wahanyemeliye mwaha woovaluwa.

Dhinafuneya wi muthu aje akanne mwiili woliba si nda: mwanaku, mazayi, nyama yopiya yohukanna makura, cipamba ompiya omusila, ni somba.


Dhooja dhinavaha kopolo si nda: mbuga, nyinga, nipapaya, kolowa, ni sima.

Muthu avaluwaga, kajege dhooja dhoheliwa makura; furuta dhikiti, pilipili, naari dhong'wa dhowaawa dhohiyana-hiyana.



Mukaka wammabeleni bwapama wa ahima. Mwaana avaluwaga mmwamwihegeve vakuvi-kuvi. Ameenayaya, teto, ejege wi ekalegena kopolo wi mmabeleni mukalege mukaka wowaakwana wa mwaana. Mukaka wa mmabeleni si yooja yowaakwanela ya mwaana. Mukaka wa mmabeleni onomwaakihedha mwaana mudhireddani. Oli wowaakwanene vomvaha mwaana, kunafuneya osasanyedhela. Kunalula, naari kunavudda.

Waamwiha onodhiha okala mumohini vaari va namabala ni mwaanaaye. Si yooja yokweya mutteengo. Kinafuneya ogula yego.



Mmuttukulele mwaana hosipitale, moona dhowi nda:

- Ahikanna kopolo;
- Akanna nipaddawe;
- Avaluwaga mudhidhi wateene;
- Avaluwaga ni mwaazi;
- Araveyaga vajinji;
- Meento yavolowa;
- Ttomela yatoda;
- Ahinyemelaga;
- Mwaana ahiyilaga mugamukamihedhe malabo meenddi vade.

Vowiireya nda, mutukuleleni mowaguva hosipitale yaddamelinyu.